



PORTAVÓS VI GOVERNUN KONSTITUSIONÁL



KOMUNIKADU BA MEDIA

Díli, Loron 24 fulan-fevereiru tinan 2017

Primeiru-Ministru hala'o vizita ofisiál ba Nova Zelândia (Zelândia Foun)

Primeiru Ministru, Rui Maria de Araújo, arranka husi Dili hodi hala'o vizita ofisiál ida ba Zelândia Foun, iha loron 25 fulan-fevereiru no sei fila hikas iha loron 4 fulan-marsu. Primeiru-Ministru timoroan ne'e sei hala'o sorumutuk bilaterál sira ho ninia omólogo neozelandés, Bill English. Halo parte iha delegasaun ne'e maka Primeiru-Ministru nia espoza, Teresa Madeira Soares, Ministru Negósius Estranjeirus no Kooperasaun, Hernâni Coelho, Ministru Interiór, Longinhos Monteiro, no Segundu Komandante-Jerál Polísia Nasionál Timor-Leste nian, Faustino da Costa.

Hala'o vizita ida ne'e hodi hatan ba konvite ida hosi Governu Zelândia Foun nian, atu vizita sidade sira Auckland, Wellington no Dunedin. Iha programa atividade nian sira ne'e inklui han-kalan negósiu nian ida iha Auckland ho objetivu atu fó koñese ba partisipante sira kona-ba desenvolvimentu territóriu timoroan nian no insentiva empreza sira husi Zelândia Foun hodibele mai investe iha Timor-Leste.

Delegasaun Timor nian ne'e sei halo diálogu ho instituisaun sira ne'ebé mak iha esperiénsia barak ona. Instituisaun sira ne'e maka hanesan Shaw Dairy Farm (indústria susu-ben), ne'ebé lokaliza iha Auckland, no Royal Albatross Centre, iha rai-dilan (península) Otago (Dunedin) nian, modelu ida ne'ebé iha susesu di'ak iha área ekoturizmu nian. Troka esperiénsia ida ne'e hodi buka tulun ba Timor-Leste atubele ba fali ekonomia ida ne'ebé diversifikada liután.

Universidade Teknolojia Auckland no Universidade Otago nian, iha Dunedin mós sei simu delegasaun timoroan nian ne'e, iha biban ida ne'ebé bele hasoru-malu ho estudante timoroan sira.

Zelândia Foun kontribui maka'as ona iha área defeza no seguransa nian durante restaurasaun independénsia, tanba ne'e maka Primeiru-Ministru sei hala'o vizita ida ba Akademia Polísia nian, iha Wellington. Evolusaun husi relasaun entre nasaun rua ne'e, haree liu ba desenvolvimentu ekonómiku, liuliu iha setór privadu, edukasaun no formasaun, seguransa no justisa. Ministru Negósius Estranjeirus Zelândia Foun nian, Murray McCully MP, vizita ona Timor-Leste iha tinan 2012 no tinan 2014 no Embaixada Timor-Leste nian iha Zelândia Foun, hetan inaugurasau iha sidade Wellington, iha tinan 2014

Portavós, Ministru Estadu Agio Pereira, observa katak "Timor-Leste simu ho di'ak biban ida ne'e atu insentiva parseria komersiál no sorumutuk ho peritu sira husi Zelândia Foun nian iha área sira ne'ebé iha importánsia boot ba ninia diversifikasaun ekonómika. Viajen Primeiru-Ministru nian ida ne'e sei hametin liután relasaun di'ak ne'ebé iha tiha ona entre nasaun rua ne'e, ne'ebé maihusi amizade no kooperasaun"

REMATA



Agio Pereira

+670 7723 0011

agio.pereira@cdm.gov.tl

govtlmedia@gmail.com

www.timor-leste.gov.tl